

# Proyecto embeyecemento Baby Beach lo finalisa na september



**ORANJESTAD** - Ayera a tuma luga demostracion di e trabounan cu ta tumando luga na Baby Beach, caminda e trabounan ta planifica pa wordo entrega memey di september unda cu esaki lo contribui na e vision pa haci San Nicolas e di dos capital turistico.

Manera cu a wordo planifica kisas te cu 3 siman di retraso memey di september e trabou aki lo wordo entrega. Minister Otmar Oduber encarga cu turismo a duna di conoce cu mescos cu Carnaval Village cu ta kedando precioso, e proyecto di Baby Beach ta un joya di proyecto.

Ta trata aki di un vision cu a base di planificacion henter Gabinete Mike Eman dos a bin ta desaroya, invertiendo den diferente aspectonan y barionan na San Nicolas.

## Costo

E proyecto aki di Baby Beach ta un ehempel grandi, un proyecto di 1.8 miyon florin cu a wordo inverti den su prome fase y e di dos lo

consisti di 600 mil Florin cu lo inclui tambe un tipo di parke di recreacion unda cu muchanan y famia por disfruta di e area aki pa local por disfruta di esaki.

“Lo crea un area cu no necesariamente tin cu bay beach pa landa, pero por disfruta di otro actividadnan”, segun e titular di Turismo. Tambe el a menciona cu lo percura den e di dos fase pa iluminacion.

Tin diferente otro proyecto na San Nicolas cu sea a termina caba of cu ta den proceso y otronan cu ta iniciando pa asina haci di San Nicolas

e di dos capital di turistico di Aruba, segun sr. Oduber.

E ta sigui bisa cu despues di 2 aña y mey di planificacion, por mira e resultado di un proyecto diferente, cu ta fit den e ambiente cu tin, combina cu parkeer, curanan cu a wordo traha y matanan cu ta dorna esaki. “Sin duda e ta un proyecto cu ta eleva e calidad di e producto di turismo pariba di nos isla.

## Blue Flag

Practicamente nos por competi pa logra e “Blue Flag” cu lo bira e prome beach na Aru-



ba cu por logra e certificacion aki. E fase cu ta continua di biah den 2 siman cu esaki termina, lo ta e kiosconan cu lo wordo traha y facilidadnan di baño”, Minister Oduber a indica.

**Proyecto y estructura nobo**  
Minister encarga cu medio ambiente Mike de Meza a bisa cu ta trahando den hopi proyecto conhuntamente cu sr. Oduber pues e ta contento cu e interes cu e ta expresa pa e parti pariba di nos isla. For di 2009 a cuminsa cu reconstruccion di Aruba nobo unda cu tin proyectonan nobo cu a cuminsa. Baby Beach antes tabata dificil pa core y haya luga pa parkeer como no tabata tin estructura y na momento cu yobe y awa subi tera e ta bira un lodo. “Si mira e estructura cu ta cla awe ta mira cu e ta bunita y a drecha e estructura cu pa añanan

tabata necesario pa e turistanan cu tabata bay bishita Baby Beach.

## DOW

E proyecto ta canando bon a pesar di algun contratiempo di utilidad cu mester a drenta, siman pasa nan a drenta si. A haya nos confronta cu trabounan imprevisto na momento di coba y bora como cu ta den un area cerca di lama. A traha un caminda di beton, mas o menos 40 pa 50 sitio pa parkeer, dorna e area cu mata, y adaptacion na e muraya cu ta separa e transhi pa menciona e trabounan haci, segun sra. Mirlen Lampe di DOW.

Den e di dos fase lo mantiene locual cu tin di area berde, no lo tin mucho construccion mas cu lo tuma luga cu lo kita di naturalesa “Nos intencion ta pa preserva esaki” sra. Lampe a finalisa. □

